

四庫全書

子部

欽定四庫全書

寶真齋法書贊卷四

宋 岳珂 撰

晉名人真蹟

王獻之洛神賦帖

九行

嬉左倚采旄右蔭桂旗攘皓腕于神澗兮採湍瀨之玄
芝余情悅其淑美兮心振蕩而不怕無良媒以接歡兮
託微波以通辭願誠素之先達兮解玉珮以要之嗟佳

人之信修兮羌習禮而明詩抗瓊琚以和予兮指潛淵
而為期執拳拳之款實兮懼斯靈之我欺感交甫之棄
言悵猶豫而狐疑收和顏以靜志兮申禮防以自持于
是浴靈感焉徙倚彷徨神光離合乍陰乍陽擢輕軀以
鷗立若將飛而未翔踐椒塗之郁烈兮步蘅薄而流芳
超長吟以慕遠兮

案珂書體例每帖皆有跋
有贊此帖無跋款係脫去

贊曰慶雲絢彩河漢縈之列星垂天日月明之先民
授能維聖成之英英後先疇其勝之有晉大令父而

况之一門擅竒世共稱之小楷之傳抑更精之芝靈
葩竒杳莫名之賜書官奴既準繩之洛神出藍而復
青之閱幾何去劫火經之鬼神護持莫憑陵之煌煌
炎圖帝中興之嚴除清廟又南榮之翰權墨衡千古
程之神覽塵藻二難并之一真既藏大訓形之流秘
下方萬目驚之或軼而傳式經營之十閱歲華迄克
膺之竭素以疇尚或矜之恍然舊觀絨且滕之有煒
廟瑟天球鳴之鄙俚混淆敢曰聲之金籥玉篴謹誌

扁之咨爾子孫思拱承之

王獻之蘇氏寶帖

草書五行米跋
小指十一行

十二月割玉不中秋不復不得想未復還慟理為即甚
省如何然勝人何慶等大軍

右蘇氏寶帖故連右軍快雪時晴帖元豐甲子獲于子
美子志東探玄子國老也印二分在快雪帖合縫四角
亦有褚氏印崇寧元年五月十五日易跋時甘露下吾
家寶晉齋碧梧甘本

猗太宰秀當代靈襟疎冲韻邁一筆落兩行帶雲龍廷
走百怪驚電掣斷兕快盤僵蹇意無在貌百川會北海
入那知冠千載襄陽米芾審定真跡手裝秘玩時以芾
字行適一繩

米元章示及二王寶墨世所罕見與予家藏十四帖筆
跡深相類也嘆服嘆服元祐丁卯孟秋二十二日李瑋

題

楷書
五行

右蘇氏所贊王獻之十二月帖真蹟一卷寶晉米芾

以贊識其後副車李瑋跋具焉所謂二王者蓋與右
軍快雪時情帖同此書也晉代遺帖今存無幾大令
襲芳名父得法自心書品入神天真造妙為法書家
傳付之祖筆奇墨古不可殫述按寶晉書史有曰余
家最上品書畫用姓名字印審定真跡印神品字印
平生真賞印米芾秘篋印寶晉書印米姓翰墨之印
鑑定法書之印米姓秘玩之印玉印六枚辛卯米芾
米芾之印米芾氏印米芾印米芾元章印米芾氏以

上六枚白字有此印者皆絕品玉印惟著于書帖其
他用米姓清玩之印皆次品也無下品者今此帖凡
著二十一印凡所載印文大概畢具又印以承平禮
部名表之印蓋方在瑞錦窠因以官識帖首有古半
印七唐褚河南家褚氏印在焉末有兩古印又半印
二下題君倩字印文不能別白隱約國老二字可見
芾謂之蘇氏寶帖蓋出太簡參政家者之故藏也方
芾無恙者刻寶晉齋帖于無為此帖蓋首出又有河

南書標題小紙今不存其後轉入中都貴游家珂嘉
定庚午歲叨官故府已聞此帖名書宛轉得拭目繼
聞貴游死其子舉書畫以售人又流落他處冥搜歷
歲託士友以十數僅而得之蓋癸未八月睽初見時
已十四年矣帖三十二字以世系先後故繫于晉三
帖之次

贊曰世未始無帖有眼如月真贗以別帖不可無傳
有筆如椽春容大篇猗歎寶晉萬古一瞬厥鑑以心

媿嫻奚適晉帖之存今幾何人有右軍之跡以竝其
秀有太簡之識以揚其芬奇氣干霄丹霞紫雲宜乎
南宮之仙下睨海嶽發金章寶篆之信振玉佩瓊瑤
之作蓋不如是則不足以表泰山之繩檢而合洞庭
之拊搏也

王操之舊京帖

行書
四行

十月十七日州民王操之頓首頓首舊京先墓毀動聞
問傷惻痛不可言未得陳慰白牋不備操之再拜

天成二年三川搜訪圖書使尚書都官郎中庾傳美西
川訪到

右晉王操之舊京帖真蹟一卷思陵臨本即此帖也
按右軍諸子操之次長筆法之妙故當與大令相似
而慰問帖率多以操之名傳淳化秘閣帖比比皆是
此帖舊藏天上嘗見之帖石刻中禁後經賜奉寧節
度李孝友奉寧祖雍王道嘗起先王麾下故羣從入
都其家率致問因得見之慶元己未歲六月燕酌席

問舉以見界卷末有後唐天成訪搜故迹并著前朝
印藏書家印識及半印通十有五筆法大興淳熙閣
帖第一卷所載門左帖相類白牋等字風骨如出一
手信家學之有傳也自癸亥定和八陵不祀主議者
畫伊嵩而棄之高望每晨夕北望未始不流涕也辛
巳哀痛之詔首以坏土之悲告天下於虜人誰無君
彼州民者事郡將尚如是曾謂策名委質迺有愧于
斯耶考心蔽罪固已上通于天矣

贊曰永嘉戎馬搖乾坤渡江一馬黃屋奔中原文獻
無復存僅有筆陣興王門猗歟大令趾右軍幾年埒
美名金昆片紙斷爛如瑤琨鸞蛟蛇蚓置勿論為問
此帖當何入豺狼父子蟻君臣綱常肇自清濁分孰
能自植無君思是時咸洛塵霾昏阡原變徙陵谷翻
家人丘隴何足言痛裂乃爾摧心肝義熙九土封函
闕遺氓遮道挽息真矢口止誦公家墳人心大義端
不泯誰其主議畫淮瀆伊瀆王氣空膏土悠悠千載

有此臣委質無乃慚州民感嘆遺墨氣涌山我欲請
劍同朱雲收亭楸橫方成阡大呼為叫天九閭

王洽永嘉帖

草書七行後兩行半
款索爛字不可辨

永嘉路遠難遂歸計國士旦晚得至

右晉領軍中書令王洽字敬和永嘉帖真蹟一卷按
晉史洽蓋始興文獻公尊之子典午後興導為宗臣
洽親承過庭之傳門地人物風流典型為晉世第一
是時書法高古王謝子弟無不以書名家而王門為

最盛蓋中原氣脉之近卓然自為一派扶搖峻極如
浴所書又為渡江第一晉之去今久矣世之先後何
止數千歲翰墨流傳豈復多存于人間此書紙素斷
朽幾不可觸而神氣嚴整體勢具在若親見佩玉珥
貂之風度古雅瓌特又為今代第一右軍嘗謂弟書
不減于吾信不誣也庾肩吾書品列之中下李嗣真
後品升之上下張懷瓘書詁著之第三又以入妙品
古今之環咸推宗馬珂閱書半生既真且逸莫此軸

若者嘉定戊辰歲二月得之中都官鬻者凡十七年
不敢議裝褫甲申三月在維揚且受代躬命工指授
汎治一室覆托潔蠲為蠟池以尊水浸熨累旬始就
袂飾而蟬息悠颺已覺加損蓋自是不復可容手矣
紙首有古印二不可識尾著小璽實存御府亦為第
一帖繫之以詩次于寶帖之後以侈存古之盛焉
贊曰瑞牛出谷既秉金錄短轅逐犢池鳳是續棲梧
食竹葩奇韻馥在此寶軸手不可觸神觀立玉宛若

在目恍其展讀烏衣之曲

梁陳名人真蹟

梁阮研宰相帖

草書
五行

為異事計此事自當徹宰相汝宜秘之惟可輕心處粗
言之耳吾初來本欲乞暫遷拜掃除庶事意令侍臨還
今直被代否不知當時

右梁交州刺史阮研字文機宰相帖真蹟一卷舊嘗
入承平中興御府有宣和半印紹興全印在馬卷首

標小帖著姓名并古半印七不可辨接淳化秘閣帖
研有書跡在羊諸蕭確之間庾肩吾嘗評其書在上
之下李嗣真書品則以為在中之上竇泉述書賦有
軟媚橫流姿容美好之褒袁昂論法有貴胄失次不
能排突英賢之議取予雖不同要是以書名家者今
觀字法與帖大類並足以驗其真嘉定辛巳八月得
之建康檜家

贊曰巨濟取帖斷于李唐而予何人波及于梁然而

攷硬黃之流別辨緗素之古香並之以淳化秘閣之
蹟印之以紹興御府之章於戲斯文不忝厥藏

梁羊詔期聚帖

草書
三行

羊詔期聚帖

御書
題籤

期聚款聚同歲功翔言曩昔絕因歷三私仰 懷充

右梁羊詔期聚帖真蹟一卷宸翰題其首開元小璽
永存珍秘印具焉噫唐以前法書印識之可證者惟
開元與貞觀在遂良則有審定在王涯則曰永存太

平則有三貌毋馱范陽則有審定游藝或著龜益竇
泉之號或分陶安東海之名知章以劔閣稱金繹以
彭城別懷瓊載永寶之字周顛紀東翰之書青襲亭
侯類分翰圖概其所見大畧可觀偉矣哉此帖既上
于帝宸復登于相第隱然遺蹟二媿並得繼入紹興
復標清賞彼辨才答蕭翼以付受之緒贊晉對林希
以上下之標方古以今夫豈多遜帖出檜家得以嘉
定庚辰三月

贊曰色秀而古湛然銀何之垂露瞭其非近世之楮
態婉而新瑩然玉壺之無塵究其似六朝之人迹澹
于屢標隱其印識之可攷維唐世之寶帖出于尚方
冠之題璽之一行維雲漢之章歷數百年之久詒彼
遺醜莫之能守予得而售或指而歎曰是為開元之
秘儲固非王涯之所當有

陳僧智永歸田賦帖

四十二行
真草間列

歸田賦 張平子

遊都邑以永久無明略以佐時徒臨川以羨魚俟河清
乎未期感蔡子之慷慨從唐生而決疑諒天道之微昧
追漁父而同嬉超埃塵而遐逝與世事乎長辭于是仲
春令月時和氣清江隰鬱茂百草滋榮王睢鼓翼商鷄
哀鳴交頸頡頏關關嚶嚶于焉逍遙聊以娛情爾乃龍
吟方澤虎嘯山丘仰飛織繳俯釣長流觸矢而斃貪餌
吞鈎落雲間之逸禽懸沈淵之鯨鯢于時耀靈俄景繼
以望舒極盤遊之至樂雖日夕而忘劬感老氏之遺誠

乃迴駕乎蓬廬彈五絃之妙指詠周孔之圖書揮翰墨
以奮藻陳三皇之軌模苟縱心于域外焉知榮辱之所
如

右陳僧智永真草歸田賦真蹟一卷按張懷瓘書斷
永書在妙品中真如佩玉瑞委之立朝草如繫壤謳
歌之樂聖體雖不同其致則一書故藏襄陽魏泰家
有故南昌人裴頴曰虞世南有古跋曰開成五年白
馬寺臨一過潭記今不存蓋即是書也源委存于米

帝書史中興而後書入九禁憲聖慈烈皇后嘗以暇
日躬御翰墨臨摹今在秘省羣玉堂帖第一卷中體
製奪真故無少異重刻表于思陵之錄雖有蘇太簡
家國老印四代相印武功圖書審定真跡印并半印
凡十三又出于淳化所賜信而可稽九代流傳兩朝
著定聖鑒賢紀餘無述焉嘉定乙亥十月得之吳韜

仲綱

贊曰平子作賦六一著錄前乎一千年既傳于草堂

之手後乎四百載仍託以稗官之目衡製永述修題

珂續

寶真齋法書贊卷四

欽定四庫全書

寶真齋法書贊卷五

宋 岳珂 撰

唐名人真蹟

歐陽詢陰符經帖

楷書二十七行

經曰觀天之道執天之行盡矣故天有五賊見之者昌
五賊在心施行于天宇宙在乎手萬化生乎身天性人
也人心機也立天之道以定人也天發殺機移星易宿

地發殺機龍蛇起陸人發殺機天地反覆天人合發萬
變定基性有巧拙可以伏藏九竅之邪在乎三要可以
動靜火生于木禍發必剋姦生于國時動必漬知之修
練謂之聖人天生天殺道之理也天地萬物之盜也萬
物人之盜也三盜既宜三才既安故曰食其時百骸理
動其機萬化安人知其神之神而不知不神之所以神
也日月有數大小有定聖功生焉神明出焉其盜機也
天下莫不見莫能知也君子得之固窮小人得之輕命

聳者善聽聲者善視絕利一源用師十倍三反晝夜用
師萬倍心生于物死于物機在目天之無恩而大恩生
迅雷烈風莫不蠢然至樂性餘至靜則廉天之至私用
之至公禽之制在氣生者死之根死者生之根思生于
害害生于思愚人以天地文理聖我以時物文理哲自
然之道靜故天地萬物生天地之道浸故陰陽勝陰陽
相推而變化順矣至靜之道律呂所不能契爰有奇器
是生萬象八卦甲子神機鬼藏陰陽相勝之術昭昭乎

進乎象矣

黃帝陰符經貞觀十一年丁酉歲九月口口日書與善

奴

上清大洞三景弟子內供奉道士張平叔題

此題係
隸書

右唐太子率更令歐陽詢字信本陰符經真蹟一卷
楷莊而勁嚴而有法紙古以香態嶮而絕真歐筆也
書與善奴又與右軍寫樂毅論賜大令者同一體製
按率更之子曰通字通帥官至內史疏小歐陽亦以

能書稱淳化閣帖中有所授筆訣亦云付善奴即其人也予塔陳天澤以寶慶乙酉五月見之中都知予篤好傾行素購之以遺予有小壘在卷後

贊曰內史書如率令善奴秀比官奴千古會稽楷則于今重見陰符

陳子昂無端帖

草書
六行

道既不行復不能知命樂天又不能深隱于山數乃亦時出于人間自覺是無端之人况漸近無聞不免自惜

如何

右唐武后朝右拾遺清邊道行軍總管府軍曹陳子
昂字伯玉無端帖真蹟一卷有小璽在卷端并米芾
審定真蹟半印一古半印四書無始末因筆陳志而
已得之與昭陵冊文同時

贊曰麟臺正字垂拱臣手持鴻筆扶金輪嗟卯自擬
教化晨尚欲圭壁全其身筆精墨妙雖有神千載乃
作無端人以人廢言古所聞尚可展卷書吾紳

裴行儉衛公帖

草書
四行

因檢文字見衛公論定裴用兵之勢歎服不能已行儉
右唐金牙總管幽州都督裴獻公行儉字守約衛公
帖真蹟一卷唐世名將公在甲乙選而以草隸名家
嘗自歎曰褚遂良非精筆佳墨未嘗輒書不擇筆墨
而妍捷者余與虞世南耳所撰選譜草字雜體至數
萬言後為武后詔武承嗣就第取去不復行于世此
帖蓋退寫李衛公兵事也不特妍捷之態信其所言

而用兵節度心融神契蓋與衛公同一軌轍高宗謂
文武兼備非公孰能當之張懷瓘書斷第公書法入
能品信不誣矣幅紙之藏千載如對書入紹興御府
拊髀之意寓焉嘉定戊辰歲二月與懷素千丈同得
之官驚者

贊曰營陣部伍妙盡四十訣而不能忘情于前輩之
遺轍草字雜體多至數萬言而僅能傳信于後世之
一編古人用心豈徒自贖精思以求全隨所寓則然

使用心皆如是則字法之妍何患乎不如其言今世之愚自謂兼善護前以矜名欲獨擅豈知公心靡恃靡夸我藏此書以愧坎蛙

崔融荷華帖

草書十行內
長者字平起

荷華想已殘處此過四夏到彼亦屢而獨不見其盛則
是亦可訝豈亦有緣即敝字今歲植得千葉者數盃亦
便發花相繼不絕今已開口口口口頗有可觀恨不與
口口口口口望雖不遠披對邈未可期伏紙可勝悵惘

即

右唐中書舍人崔融字安成荷華帖真蹟一卷筆勢
洞精紙素古雅鳳鸞駉驟寔為竒蹟融本文士筆法
不多見開元中張說常與韋堅論近世文章謂李嶠
薛稷宋之問與融之文如良金美玉無施不可固罵
論矣攷之此帖豈翰墨之妙其得于天者亦與之相
表裏即寶章之序武成之觀積千古之見聞攷一時
之期屬固已知深于書矣印以小璽并古半印二不

可辨嘉定癸未歲十二月得之嘉禾王希呂尚書家
贊曰六郎之風姿秀于清池初日之華蕤流景發暉
種玩之誰宜有美人兮挾胸中之竒筆下其似之

賀知章事宜帖

草書
三行

以諸人不至今日自當得口事宜諸人何為不報也

國老題

右唐秘書監贈禮部尚書賀知章字委真事宜帖真
蹟一卷鏡湖老監以能書名固已見于李白之詩實

欽定四庫全書

續其書法高貴

六

泉之賦今觀其帖高逸豁達乃爾精絕並信開元盛
時文館十八學士俱足以追貞觀之遺風歐褚清塵
尚可及也帖有小璽蓋蘇耆家攜藏有國老題字開
禧乙丑歲三月予在京口得之故簪紳家不欲名

贊曰讀騎馬之歌而知其人之曠達觀換鷲之詩而
見其時之尊慕閱集賢之畫而識其像于後世拜千
秋之祠而想其高于前古稽山之雲方齋鏡湖之月
初吐一曲浩蕩十一呈露是不惟足以忘世間之塵

紛而亦可因以攷筆端之風度也

顏真卿朝迴帖

行書
六行

不審所苦何如奉計已痊復真卿緣馬病朝迴已乏未
遂馳謁謹勒參候不次真卿狀上李太保大夫公閣下

右唐太子太師贈司徒魯郡顏文忠公真卿字清臣
朝迴帖真蹟一卷文與秘閣帖相似而小大不同公
忠節貫穹壤筆法冠古今胷中所存凜凜不屈筆下
是以言言如生百世而下尚可拜而仰也帖本家藏

無得書歲月

贊曰公之素守日烈霜嚴公之大節斗揭巖膽筆勢
所存心畫可占八法具體匪柔匪鈎庶彙流形如騫
如潛塊北是似端倪孰覘人以藝進公以德兼凜其
高風氣壓萬籤公神在天公書在奩繫贊以藏震于
壬儉

徐浩謝賜書帖

楷書七行
凡批一行

臣言伏奉詔書賜臣漢故南陽郡太平鄧恢素書一十

五行奇跡遠至臣孤見寡聞所未遇臣當臨做冀日進
並不任欣戴謹奉表以聞臣誠惶誠恐頓首死罪

惠于必省之

案此五字即所謂凡批一行
然文義不可解當有脫誤

昌朝觀于許昌郡齋癸巳五月

楷書
兩行

陳表自揚携此書并魯公帖來見過時在白沙溫陵朋

父

行書三行溫陵明
父字元傑分注

字圖熟而行筆工巧其人存心未可知也元祐三年十

一月十四日熟中題

楷書
四行

明年寒食元章倦游閣觀

行書
兩行

晏元圭張彥通張敦叔同觀于禪居寺元符庚辰

楷書
一行

元符庚辰字
元像分注

沈括存中觀于百花堆元祐五年季春十九日書

行書
兩行

元符二年八月二十四日高郵道中觀濂溪周壽元翁

小楷
一行

阜嘗就觀己巳秋八月題

楷書
一行

崇寧壬午孟夏李東文章君遠同觀于泗上通守公宇

中獨秀峯前

小楷
兩行

右唐中書舍人尚書右丞集賢學士副知院事國子
祭酒會稽郡公徐浩字季海謝書帖真蹟一卷有御
府印一古半印二本朝賈曾二相光元章沈存中諸
公皆書其後按史傳浩以八體名天寶至德兩充訪
圖書使能精而見博固後世之所莫及而浩之祖九
隴縣尉師道父汝州刺史嶠之真行草皆名冠古今
無與為比源長流沒又非淺學得以易窺信帖傳至

今為可寶也嘉定庚辰歲二月得之鄜塢

贊曰南陽素書浩之所珍而本朝觀浩之書又皆以
為絕倫今視諸賢之跋凡十有三人歲月幾何又不
能髣髴其清塵書意日新而迹日陳白首之攻庶幾
信今

張長史春草三帖

六行凡
三本

春草青青千里餘邊城落日見離居情知海上三年別
不寄雲間一雁書 旭書 隱之

昇元口年十一月口日重題印

文房檢點銀青光祿大夫兼監察御史臣陳遵鄴文房
押司官銀青光祿大夫兼御史中丞臣楊德綸文房副
使銀青光祿大夫兼殿中侍御史臣周承望文房副使
銀青光祿大夫兼御史中丞臣邵周崇英殿副使知崇

英院兼文房官檢校工部尚書臣王紹顏

又二帖
同前

唐張顛春草詩

一外截古經紙上御書墨字
一內截青絹上御書金字

右唐左率府長史張旭字伯高春草詩三帖真蹟各

一卷其一得之中都本江南李氏故藏有建業文房
三印并古印二文房官職銜鴈行于左刻在御府帖
中其二得之京口鍾氏卷左亦有文房印識二古印
一并續卷後縫有小璽七其三得之忠訓郎苟夢玉
苟使蒙古還至雲中以香舜易得之祐陵金字宸奎
在馬首尾著政和宣和八璽亦有內府圖書璽予按
長史以草聖得名蓋其天真爛漫妙入神品而非架
瘦步武者比前後所見大體如是然一詩三帖豈伯

高平生于此篇每切寄意正猶大令作洛神賦人間
合常有數本之比耶一以神雋稱一以法度著又何
其不同也最後一軸則類後人所模倣者虞思外庫
如儲宏輩固不可以賞鑒期所以例窟壁附之龍殆
以此故雖然既列天鑿矣詎復可以淺識汰彼其軒
然露頭角者亦自不可掩也因存鼎峙以俟知音

贊曰變作八音草諶咸雲婁辨五色朱紫玄纁偉絕
藝之天成隨所施而冠羣既運斤而薦巧亦端委而

長身或有若而闕里或蔡邕而虎賁是其同者體而不同者神藻繪既後素筮鏞無奪倫夫是之謂寶真

張長史秋深帖

十行帖首秋深至復字行者氣力字早起

秋深不審氣力復如何也藏弊何知可論河南送物人近來得京中消息承彼數年不熟憂懃不復可論不委諸小大如何為活計幾日有京中信使知之當數報委曲耳

右唐張伯高秋深帖真蹟一卷按寶晉書史云真蹟

四帖在杭州陸氏大姓家舊有五帖第一秋深第二
前發第三汝官第四昨日第五承湏今所存四帖汝
官後有一古印文訛不可辨昨日承湏二帖小襪紙
也陸氏子素從關景仁學關因借摹三大帖余昔見
石本于關中宋氏及官桂林關杞為使者語及始知
石在關氏又五年官潭關杞通判邵州以石本見寄
又三年官杭而關景仁為錢塘令因陸氏子登第者
來謁與謝而閱之獨失秋深第一帖詰之翼飛而言

嘉祐中為太守沈文通借閱拆留余遣工摹餘帖即
歸詰文通弟邀時為郡從事乃云在其姪延嗣處遂
得閱徐購得之即是書也慶元辛酉歲八月有鄂州
姚氏嘗以西班仕孝宗朝乘輅按刑酷好帖字其家
不能保故余因試漕臺介僧德茂得之有古縫印及
印迹可見者四并小璽在卷尾

贊曰煒五帖兮迄今信第一兮秋深彼伯高兮書淫
人爭取兮千金攷步武兮可尋付纖穠兮何心婉闕

沈兮鳴琴尚海岳兮知音

懷素千文帖

一百八十五行內稱鳴琴致彩明繪又號素要任隨十二字並階注內彩字

又係
單注

千字文 敕員外散騎侍郎周興嗣次韻

天地玄黃 至 馬哉乎也

全文

國老題

行書

右唐僧懷素字藏真草書千文真蹟一卷予嘗得內
府舊帖此書在首卷中筆勁墨妙傳付甚真嘗動天
鑒襄陽米芾元章著寶章待訪錄其間第三十五事

特載此書係絹本藏蘇液家有沈文通刻板本行于世後入章丞相子厚家又見于書史液蓋太簡參政曾孫而耆國老之孫藏書精鑒為本朝第一今卷尾有國老題字及有武功印十九半印四皆蘇氏遺蹟又曾入山谷家後自御府賜貴臣有山谷與貴臣家二印并一小壘在馬接朱長文續書斷素長沙人自云嘗觀翼雲隨風變化頓有所悟遂至妙絕如壯士拔劍神彩動人顏魯公嘗有書云昔張長史之作也

時人謂之張顛今懷素之為也僕寔謂之狂僧以狂
繼顛孰謂不可耶其定著入妙品今視信然又按羣
玉堂帖別有千丈一卷亦稱素書與此叟異豈遊戲
翰墨隨寓輒寫其所出不一耶王大令之洛神賦張
伯高之春草詩筆塚用工之深殆不應出其下層見
疊出回應爾耳嘉定戊辰歲二月予既多得官鶯帖
將歸有界南債繒絲孫氏者射請囊帛得此書于故
衣袖中予以二萬錢取之雖絹素塵暗而神裁軒翥

如非烟卿雲輝煥九霄宿霧晨靄益助妍態真可寶也

贊曰鷓鴣徙海龍蛇起陸思妙天隨神鍾鬼哭垂露在手非烟眩目錦紱瓊機光我韞櫝

懷素秋風帖

行十二

此相遇極慰積心人情逼深江事來甫爾遂不果款悉

海

案帖首及江字上下海字上下俱有闕文

我有數行淚不落十餘年今日

為君盡併灑秋風前

右唐僧懷素秋風帖真蹟一卷草法入聖精藝無敵
紙素亦蠹朽不可觸絕匪後人所能運庭者著以御
府印慶元庚申十月予來建康得之士人張珉家後
二十四年卷軸經屢閱皆罅罅碎斷始以癸未歲十
一月重裝于維揚因取而贊之

贊曰僚慄之秋騷人所悲彼僧何為乃偶以辭絕藝
出塵亦寄馬耳雲烟蒼茫在此幅紙

懷素律公帖

行九

貧道頻患腳氣異常憂悶也常服三黃湯諸風疾兼心中常如刀刺乃可處方數日服不然客舍非常之憂耳律公能枉步求貧道顛草斯乃好事也奉洗不盡垂悉沙門懷素白

右懷素書律公帖臣米友仁鑒定真蹟恭跋

右唐僧懷素律公帖絹本真蹟一卷凡帖非有意于傳也遇事而作合乎天真過是弗復可得矣茲帖也以問疾為酬答託諸好事寓以縑素固非無意于傳

也天真之合雜草而行隨用無別則其所造非違原
自得者疇克爾哉按寶晉書史安師文家懷素絹帖
三本此為第三元祐戊辰歲安君攜至留米家月餘
臨為乃還後有呂汲公大防已下題今歸章子厚即
此本也紹興間嘗入九禁遂命米友仁鑒定雖言其
真而不及寶晉篤好之詳豈不之攷耶呂跋不復見
矣小壘繫識于後又刻在御府帖中繼賜貴戚因遂
流傳人間淳熙丁酉得之中都先君手裝

贊曰噫懷素善草書雜真行世所無妙之臻理不殊
蓋反觀同其初

段文昌秋氣帖

草書
六行

總不得書何為如此秋氣稍冷不知當如何也有華陽
消息可報委曲十四日報

右唐御史大夫段文昌字墨卿秋氣帖真蹟一卷按
唐世播紳家以上達下其制相承名之曰委曲蓋今
之批示也迄于國初猶多用之史傳所書如高駢輩

類不止一見此帖蓋當時授其家隸者前有古印不
可辨小璽并一小印在卷首尾得之歲嘉定庚午月
黃鍾日中泚售者江陰王氏

贊曰唐世士大夫委曲之連下多矣而曰此獨存其
用情則通而真其下問則仁而溫其字體之奇縱入
神猶在所未論也於庠辨分有倫待人以身風俗其
淳我思古人

裴素明日帖

草書
八行

裴素制誥書寶歷元年楊嗣復相公下及第更不知聞
是何薄情也明日為吾人請假一日具空繪祇望候捨
却他事早見訪也更無人惟有崔十學士此走狀不宣
素再拜二十一官郎中使君閣下二日

右唐知制誥裴素字口口明日帖真蹟一卷唐固多
竒蹟如素亦未以能稱而可見者如此亦足以知其
習俗之不凡也嘉定辛未歲九月予因上泮過壽星
山與客訪古有僧錄壽者逮事高廟多蓄名帖購得

數紙以歸始末著五印按宰相世系表素系出東眷
冕之姪尋之子云

贊曰有王茂宏之筆勢予非取其麗從容而大肆巧
者以愧尚庶古意

唐史惟則篆千文帖

一百一十八行尾記一行帖
首五行絹素斷裂有字不全

處內民淵基世治幾機機
字並闕當是避唐諱云

果珍李奈至焉哉乎也

河南府陽翟縣丞史惟則書

八分書
一行

右唐殿中侍御史惟則字口口篆千字文絹本真蹟一卷上有九古印勞勳可識者曰清河德異圖書縫著內殿祕書等印六經賜李氏嘉泰甲子十二月李保大孝純餞予之官京口以為贖接惟則在法書家以能篆名竇泉述書賦有曰心復世業階乎籀篆古今由中大小應變如因高而矚遠俯川陸而畢見朱長文續書斷又稱其與韓擇木蔡有鄰李潮四人皆能八分擇木為妙惟則亞之而有鴈印平沙魚躍

深淵之評今此書前以篆後以八分益兼有之矣集
賢注記謂是開元時人嘗以二十年三月自吏部常
選入院待制仍校理述書賦續書斷又謂嘗為伊闕
尉後至殿中是帖結銜乃云河南府陽翟縣丞不著
歲月其在入院之先後皆莫可攷然觀其書法竒妙
得雅趣所謂待制殆以善書備諮訪耶昔唐懷素草
聖自序藏蘇泌家亡其卷首一幅其文集賢校理舜
欽補之今在淳熙祕閣續帖中字態如出一手幾不

可辨今此帖亦不存前幅安得如滄浪之書者為我
成之斷珪瑕璧虹氣猶在顧亦可寶也已

贊曰籀學在唐陽冰一變彼秩八音各有工師斯帖
之奇體微而具何以譬之磬囊鼓武



寶真齋法書贊卷五

欽定四庫全書

子部

寶真齋法書贊卷

六五
十

詳校官中書臣孫溶

檢討臣德生覆勘

總校官候補中允臣王無緒

校對官庶吉士臣潘紹觀

謄錄監生臣吳熙春

欽定四庫全書

寶真齋法書贊卷六

宋 岳珂 撰

唐名人真蹟

唐許渾烏絲欄詩真蹟

余卅歲業詩長不知難雖志有所尚而才無可觀大中三年守監察御史抱疾不任朝謁堅乞東歸明年少間端居多暇因編集新舊五百篇置于几案聊用自適非

求知之志也時庚午歲三月十九日子丁卯澗村舍手

寫此本

內御史字
係續添注

登凌歊臺一首

臺在當塗縣北五
里宋高祖所築

宋祖凌歊樂未迴三千歌舞宿層臺
湘潭雲盡暮山出巴蜀雪消春水來
行殿有基荒薺合寢園無主野棠開
百年應作萬年計巖上古碑空綠苔

途經驪山一首

聞說先皇醉碧桃日華浮動鬱金袍
風隨玉輦笙歌迴

雲捲珠簾，劔佩高鳳，駕北歸山。寂寂龍旗，西幸水涵涵。
貴妃歿後巡遊少瓦落宮牆，見野蒿。

咸陽西門城樓晚眺一首

一上高城，萬里愁蕙，葭楊柳似汀洲。溪雲初起，日沉閣
南近磻溪西對慈福寺閣山雨欲來，風滿樓。鳥下綠蕪，秦苑夕蟬鳴。

黃葉漢宮秋，行人莫問前朝事。渭水寒聲，晝夜流。

送蕭處士歸緱氏別業一首

醉斜烏帽，髮如絲。曾看仙人一局棋。賓館有魚，為客久。

鄉書無鴈到家遲
緱山住近吹笙廟
湘水行逢鼓瑟祠

今夜月明何處宿
九疑雲盡綠參差

內鄉字元作象字
注改小字元作氏

字注改幾字元作
疑字從小添筆

元日一首

高揭雞竿闕帝閭
祥風微暖瑞雲屯
千官共削奸臣迹
萬國初銜聖主恩
宮殿雪華齊紫閣
闕河春色到青門
華夷一軌人方泰
莫學論兵誤至尊

金陵懷古一首

玉樹歌愁王氣終景陽兵合畫樓空梧楸遠近千官塚
禾黍高低六代宮石燕拂雲晴亦雨江狔吹浪夜還風
英雄一去豪華盡惟有青山似洛中

南海府罷南康阻淺行侶稍稍登陸而過宴餞至頻暮

宿東谿一首

而遇二字元作至
而頻字係注改

晴灘水落漲虛沙灘去秦吳萬里斜馬上折殘江北柳
舟中開盡嶺南花離歌漸怨如留客鄉夢初驚似別家
山鳥一聲人未覺半牀春月在天涯

聞開江相國宋公下世二首

權門陰進奪移才，駟騎如星墮峽來。
晁氏有恩忠作禍，賈生無罪直為災。
貞魂誤向崇山歿，冤氣疑從汨水迴。

畢竟功成何處是，五湖雲月一帆開。

內忠字原傑，中字從心，傑添之筆。

月落清湘棹不喧，玉盃瑤瑟奠蘋蘩。
誰令力制乘軒鶴，自取機沈在檻猿。
位極乾坤三事貴，謗興華夏一夫冤。
宵衣旰食明天子，日伏青蒲不為言。

題汴河亭一首

廣陵花盛帝東遊，先劈洪河一派流。
百二禁兵辭象闕，三千宮女下龍舟。
凝雲鼓震星辰動，拂浪旂開日月浮。
四海義師歸有道，迷樓何異景揚樓。

登崧山觀發軍一首

羽檄徵兵急，棘門選將雄。
蟲沙憂破竹，貔虎極飛蓬。
定繫獨狂輩，何煩矍鑠翁。
更探黃石畧，重振黑山功。
別馬嘶營柳，驚烏散井桐。
依星連寶劍，殘月護雕弓。
浪曉戈鋌裏，山晴鼓角中。
甲開魚照水，旂颺虎穿風。
去想金河

遠行知玉塞空漢庭應有問師律在元戎

送前緱氏韋明府南遊一首

酒闌橫劍歌日暮望關河道直去官早家貧為客多山
昏函谷雨水落洞庭波莫盡遠遊意故園荒薜蘿

題張司馬灞東郊園一首

楚翁秦塞住昔事李輕車白社貧思橘青門老仰瓜讀
書三選草沽酒一籬花更欲尋芝朮商山便寄家

內李
輕車

三字九
源添注

送張處士一首

鱖罷衆賓散長歌携一卮
漢亭相送遠山郭獨歸遲
風檻夕雲散月軒寒露滋
病來雙鬢白不是別離時

移攝太平寄前李明府一首

病移巖色稱閒身何處風光賞
酒頰溪柳遶門彭澤令
野花連洞武陵人嬌歌自駐壺
中日艷舞長留海上春
早晚高臺更同醉綠蘿如帳草
如茵

晚自東郭迴留一二遊侶一首

鄉心迢遞宦情微，吏散尋幽竟落暉。
林下草腥巢鷺宿，洞前雲濕雨龍歸。
鐘隨野艇迴孤棹，鼓絕山城掩半扉。
今夜西齋好風月，一瓢春酒莫相

陵陽春日寄汝洛舊遊一首

百年身世似飄蓬，澤國移家田嶂中。
萬頃碧波魚戀釣，九重青漢鶴愁籠。
西池水冷春巖雪，南陌花香晚樹風。
縱倒芳樽心不醉，故人今在洛城東。

將歸姑孰南樓餞送前李明府一首

無處登臨不繫情一憑春酒醉高城
暫移羅綺見山色
纔駐管絃聞水聲
花落西亭添別恨
柳陰南浦促歸程
前期迢遞今宵月
更倚朱欄待月明

宣城開元寺贈元李上人二十韻一首

一鉢事南宗
僧儀稱病客
曹溪花裏別
蕭寺竹前逢
燭影深寒殿
經聲徹曙鐘
欲齋簷睡鴿
初定壁吟蛩
詩繼休遺韻
書傳永逸蹤
藝多人譽洽
機絕道情濃
汲澗餅沈藻
眠堦錫掛松
雲鳴新放鷓
池卧舊降龍
露茗山厨

焙霜抗野碓春杖文明處譯禪衲腹時縫層塔題應徧
飛軒步不慵繡梁交辟荔畫井倒芙蓉翠戶垂旂網朱
牕列劔鋒寒飈金磬響晴雪玉樓重妙理三乘達清才
萬象供山高橫睥睨灘淺聚鰲鱗微靄蒼平楚殘暉淡
遠峰林疎霜槭槭波靜月溶溶劔出因雷煥琴全遇蔡
邕西方如有社支許合相從

泛五雲溪一首

北溪何處路遙問白髯翁佛廟千巖裏人家一島中魚

傾荷葉露蟬噪柳林風急瀨鳴車軸微波漾釣筒石苔
縈棹綠山果拂舟紅吏就前村宿村橋與剡通

津亭送張崔二侍御散北歸一首

愛樹滿西津津亭墮淚頻素車應度洛珠履更歸秦水
接三湘暮山通五嶺春傷離與懷舊明月白頭人

韶州送竇司直北歸一首

江曲山如畫禽程亦駐舟果隨巖狖落槎帶水禽流客
散他鄉夜人歸故國秋樽前掛帆去風雨在西樓

再遊越中傷朱慶餘恻律好直上人一首

昔年湖上客留訪雪山翁
王氏船猶在蕭家寺已空
月高花有露烟合水無風
處處多遺韻何情入剡中

寄題高山王隱士居一首

近逢商洛客知爾住南塘
草閣平春水柴門掩夕陽
隨蜂收野蜜尋麝採生香
更憶前年醉松花滿石牀

留贈偃師主人一首

孤城漏未殘徒侶拂征鞍
洛北去愁遠淮南歸夢闌
曉

燈迴壁暗晴雪捲簾寒強盡主人酒出門行路難

和祠部楊員外以僕射楊公拜官致仕舊府賓僚及禮
部楊侍郎同年門生先輩合饌申賀座中飲後書事一
首

龍闕公卿拜後塵手持優詔掛朱輪從軍幕下三千客
聞禮庭中七十人錦帳麗詞推北巷畫堂清樂掩南鄰

豈同王謝山陰會空序流盃醉暮春

序字係
添注

秋日侯朝一首

宵衣應待絕更籌
環珮珊珊月下樓
井轉轆轤千樹晚
鏤開閭闔萬山秋
龍旂盡列趨金殿
雉扇纒分拜玉旒
虛戴鐵冠無一事
滄江歸去老漁舟

內轆字元
係添注

經李俊殿中舊宅一首

歸作儒翁出致君
北山誰復有移文
漢庭使氣摧張禹
楚國懷憂送范雲
楓葉暗時迷舊宅
茅花高處認荒墳

朱絃一奏沈湘怨
風起寒波日欲曛

內起寒二字元
作寒起係乙轉

題靈山寺行堅師院一首

西巖一迳不通樵八十持盃未覺遙龍在石潭聞夜雨
鴈移沙渚見秋潮迳涵霧濕文多暗香印風吹字半消
應笑南來又東去越山無路水迢迢

嘗與故宋補闕次都秋夕遊永泰寺後湖今復登賞愴
然有感一首

西風渺渺月連天同醉蘭舟未十年鷓鴣賦成人已歿
嘉魚詩在世空傳榮枯盡寄浮雲外哀樂猶驚逝水前
日暮長堤更回首一聲鄰笛蕩山川

京口閒居寄兩都親友一首

吳門煙月昔同遊，楓葉蘆花並客舟。
聚散有期雲北去，浮沈無計水東流。
一樽酒盡青山暮，十里書迴碧樹秋。
何處相思不相見，鳳城宮闕楚江樓。

臥疾一首

寒牕燈盡月斜暉，珮馬朝天獨掩扉。
清露已凋秦塞柳，白雲應長越山薇。
病中送客難為別，夢裏還家不當歸。
惟有寄書書未得，卧聞燕鴈向南飛。

山行至雙巖溪訪元隱居隱居已榜舟詣開元寺水閣
見送棹迴已暮因贈一首

犬吠雙巖碧樹間主人朝出半開關
湯師閣上留書別杜叟橋邊載酒還
樵塢炭烟晴過嶺
蓼村漁火夜移灣
故鄉燕沒兵戈後
憑向溪南買一山

與韜鄭二秀才同舟東下洛中親朋送至景雲寺一首
三十六峯同一川
綠陂無路草芊芊
牛羊晚食鋪平地
鵝鵝晴飛摩遠天
洛客盡迴臨水寺
楚人皆逐下江船

東西未有相逢日更把繁花共醉眠

冬日登越王臺懷歸一首

月沈高岫宿雲開
萬里歸心獨上來
河畔雪飛揚子宅
海邊花盛越王臺
龍分桂嶺魚難過
瘴近衡峯鴈卻迴
鄉信漸稀人漸老
只應頻醉北枝梅

將赴京師津亭別蕭處士二首

樽前萬里愁楚塞
與皇州雲試瀟湘
雨風知鄠杜
秋潮平仍倚棹
月上更登樓
他日滄浪水
漁歌更白頭

津亭多別離楊柳半無枝住接猿啼處行逢鴈過時江
風颭帆急山月下樓遲還就西齋寢煙波勞夢思

經馬鎮西宅一首

將軍久已歿行客自興哀功業山長在繁華水不迴亂
芹侵廢井荒菊上崩臺惟見軍中卒朝朝戲馬來

早發壽安濟永濟渡一首

東西車馬塵鞵浴與咸秦山月夜行客水烟朝渡人樹
涼風浩浩灘淺石磷磷會待功名就扁舟寄此身

寓居崇聖寺送客南歸一首

野寺薜蘿晚官渠楊柳春歸心已無限更送洞庭人

聞歌一首

新秋絃管清時轉過雲聲曲盡不知處月高風滿城

塞下一首

夜戰桑乾雪秦兵半不歸朝來有鄉信猶自寄征衣

晨裝一首

帶月飯行侶西遊關塞長晨鷄鳴遠戍宿鴈起寒塘雲

卷四山雪風凝千樹霜誰家歌舞散沈醉卧蘭堂

早別儵然上人一首

吳僧誦經罷敗衲倚蒲團鐘韻花猶斂樓陰月向殘晴
山開殿響秋水卷簾寒獨恨孤舟去千灘復萬灘

早秋一首

遙夜泛清瑟西風生翠羅殘螢委玉露早鴈拂銀河萬
樹曉猶密遠山晴更多淮南一葉下自覺老烟波

凌歊臺送韋秀才一首

雲起層臺日未沈
數村殘照半巖陰
野蠶成蠶桑柘盡
溪鳥引雛浦稗深
帆勢依依投極浦
鐘聲杳杳隔前林
故山迢遞故人去
一夜月明千里心

送嶺南盧判官罷職歸華陰別墅一首

曾事劉琨鴈塞空
十年書劍任飄蓬
東堂舊屈移山志
南國新留煮海功
還掛一帆青草上
更開三迳碧蓮中
關西親友如相問
已許滄浪伴釣翁

贈蕭兵曹先輩一首

廣陵隄上昔離居
帆轉湘南萬里餘
楚澤病時無鴈鳥
越江歸處有鱸魚
潮生水國蒹葭響
雨過山村橘柚疎
聞道携琴還載酒
臨邛休羨馬相如

南海府罷歸京口郊居
途經大庾縣留贈張明府一首
樓船旌旆極天涯
一劔從軍兩鬢華
迴日眼明河畔柳
去時腸斷嶺頭花
陶詩盡寫行過縣
張賦初成夢到家
官滿知君有歸處
吳王臺殿舊烟霞

村舍二首

自剪青莎織雨衣村南烟火是柴扉
萊妻早報蒸蒸熟
通子遙迎種豆歸魚下碧潭當鏡
躍鳥還青嶂拂屏飛
花時未免人來往欲買嚴光舊釣磯

尚平多累自休難一日深居一日安
山路有雲收獵網
水亭無月掛漁竿花間酒氣春風
遠竹裏棋聲夜雨寒
三頃湖田秋更熟北牕誰拂舊塵冠

將渡固城湖阻風夜泊水陽戍一首

行盡清溪日已暮雲容山影水嵯峨
樽前歸客怨秋夢

樓上美人凝夜歌，獨樹高高風勢急。
平湖渺渺月明多，終期一艇載樵去。
來往使帆凌白波。

故洛城一首

黍稷離離半野蒿，昔人城此豈知勞。
水聲東去市朝變，山勢北來宮殿高。
踰嶽噪暮雲歸古堞，鴈迷寒雨下空濠。
可憐嶽嶺登仙子，猶自吹笙醉碧桃。

題四皓廟一首

桂花松暖廟門開，獨瀉椒漿奠一盃。
秦法欲興鴻已去。

漢儲將廢鳳還來紫芝翳翳多青草白石蒼蒼半綠苔
山下驛塵南竄路不知冠蓋幾人迴

出關一首

朝纓初解佐江濱康鹿心知自有羣漢園獵稀慵獻賦
楚山耕早任移文卧歸漁浦月連海行沒塵埃花隔雲
關吏不行迎馬笑去時無意學終軍

送從兄別駕歸蜀一首

從兄彥昭與桂陽今韋伯達勇
元中俱為千牛伯連官至楚王

長史亦以藝文自任長慶初非罪受譴前年會赦復故
秩詔未及而身已歿從兄自蜀而南發旅觀歸葬瀟上

既而西還因
杯十韻此別

聞與湘南令童年侍玉墀家留秦塞曲官謫瘴溪涓道
直奸臣屏冕深聖主知逝川東去疾滯澤北來遲青漢
龍髯絕蒼山馬鬣移風淒聞笛處月慘罷琴時客路黃
公廟鄉闕白帝祠已稱鸚鵡賦寧誦鶴鶴詩遠道書難
達長亭酒重持當憑蜀江水萬里寄相思

內塞字鶴字
係添注龍字

輔字係筆
誤修改

自洛東蘭若夜歸一首

一衲老禪牀
吾生半異鄉
管絃愁裏醉
書劍夢中忙
烏
急山初暝
蟬稀樹正涼
又歸何處去
塵路月蒼蒼

行次潼關驛一首

紅葉晚蕭蕭
長亭酒一瓢
殘雲歸太華
疎雨過中條
樹
色隨關迥
河聲入海遙
帝鄉明日到
猶自夢漁樵

內殘雲疎

雨驟元作連帆春水濶高寺夕陽襟內陽字易字不成上有補獨已不存其筆畫猶隱然在紙上云

別韋處士一首

南北斷蓬飛
別多相見稀
更傷今日酒
未換昔年衣
舊

友幾人在故鄉何處歸秦原向西路雲晚雪霏霏

奉陪少師相國李公廣客相國李公宴居守僕射狄公

池亭一首

池色似三湘仙舟日正長燕飛鷺映蝶魚躍動鴛鴦雲
聚歌初轉風迴舞欲翔暖醅松葉嫩寒粥杏花香羅綺
留春意笙竽送晚尤何須明月夜紅燭在華堂

暝投靈智寺渡溪不得緣江路一首

雙巖瀉一川迴馬斷橋前古廟陰風地寒鐘暮雨天沙

虛留虎跡水滑帶龍涎卻下臨江路潮深無渡船

遊譙山新興寺宿石屏村謝叟家一首

晚過石屏村村長日易曛僧歸下嶺見人語隔江聞谷

響寒耕雪山明夜燒雲家家扣銅鼓欲賽魯將軍

村有魯廟

廟

與羣公宴南亭一首

秋來水上亭幾處似巖扃戲鳥翻紅葉游龜帶綠萍管

弦心戚戚羅綺鬢星星行樂非吾事西齋尚有螢

孟夏有懷一首

綠樹蔭青苔柴門臨水開
葷涼初熟麥枕潤乍經梅魚
躍海風起鼉鳴江雨來
佳期今已晚日夕上高臺

題聖女祠一首

停車一卮酒涼葉下陰風
龍氣石牀濕鳥聲山廟空
長眉留桂綠丹臉寄蓮紅
莫學陽臺伴朝雲暮雨中

蒙賓客相國李公見示和宣武盧尚書以吏部高尚書
自江南赴闕貺大梨重以將雛白鷗因贈五言六韻之

什報敢獻和一首

內自江南赴闕
五字元係添注

巨寶珍吳果馴雛重越禽摘來漁浦上携在兔園陰符
谷凝丹頰風枝斂素襟刀分瓊液散籠掩雪華深虎帳
齋中詠龍樓洛下吟含消蕪受彩應貴冢卿心

歲暮自廣江至新興往復道中留題峽山寺四首

夜醉晨方醒孤吟乍失羣海鰭潮上見江鶴霧中聞未
臘桃先實經冬草自薰樹隨山崦合泉到石稜分虎帳
空林雨猿聲絕嶺雲蕭蕭異鄉鬢明日共絲棼

薄暮緣西峽停橈一訪僧鷺巢橫卧柳後飲倒垂藤水
曲巖千疊雲重樹百層山風寒殿磬溪雨夜船燈灘漲
危槎沒泉衝怪石崩中臺一楸淚歲抄別良朋

密樹分蒼壁長溪抱碧岑海風聞鶴遠潭日見魚深松

蓋環清韻榕根架綠陰

南方有大葉榕樹橫枝危者輒
生根垂入地如柱大者合抱

洞丁多斲石蠻女半掏金

端州斲石塗
辣掏金為業

南浦驚春至西

樓送月沈江流不過嶺何處寄歸心

內容字元係
格字修改

月在行人起千峯復萬峯海虛爭翡翠溪邏關芙蓉

南方

呼市為虛呼戎為邏新
州有翡翠虛芙蓉運

古木花生斜陰池滿種松

木樹花生

于他樹槎枿池沼多種松謂之水松松根即抱木也

火探深洞燕香送遠潭龍

南方

人持火于乳洞中捕燕食之原州悅城縣有媪龍狀如蛇常迎送舟楫或千里之外人多以金帛香火送之

藍塢寒先燒禾堂晚併春

種藍多在塢中冬燒其地人木槽春米謂之禾堂也

暝投何處宿西峽隔雲鐘

內花字元作古改作高又注作花

始至潼關一首

飛閣架層臺然童此路迴山形朝岳去河勢抱關來鴈

過秋風急雞鳴宿霧開平生無限量驅馬任塵埃

內岳字元

係修

改

湯處士返初後卜居曲江一首

鴈門歸去遠垂老脫袈裟
蕭寺林為客曹溪便寄家
綠琪千歲葉黃槿四時花
別怨應無限門前桂水斜

發靈溪館一首

山多水不窮一葉似漁翁
鳥浴寒潭日猿吟暮嶺風
雜英垂錦繡衆籟合絲桐
應有桃溪路千巖萬壑中

放猿一首

殷勤解金鑠昨夜雨淒淒山淺懷巫峽水寒思建溪速
尋紅樹宿深向白雲啼便覓南歸路烟叢莫自迷

下第別楊至之一首

花落水潺潺十年離舊山夜愁添白髮春泪減朱顏孤
劍北遊塞遠書東出關逢君話心曲一醉灞陵間

題湖州韋長史山居一首

一官惟買畫公堂但得身閒日自長琴曲少聲重勘譜
藥丸多忌更尋方溪浮箬葉添醅綠泉逸松根助茗香

明日鰕魚何處釣門前春水下滄浪

過鮑溶宅有感一首

寥落故人宅重來身已亡古苔殘墨沼深竹舊書堂秋色館池靜雨聲雲木涼無因展交道日暮倍心傷

寄兄弟一首

江城紅葉盡旅思倍淒涼孤夢家山遠獨眠秋夜長道存空倚命身賤未歸鄉南望仍垂淚天邊鴈一行

秋日一首

有計自安業秋風罷遠吟
買山惟種竹對客更彈琴
烟起藥廚晚杵聲松院深
閒眠得真性惆悵舊時心

卜居招書侶一首

憶昨未知道臨川每羨魚
世途行處見人事病來疎
微雨秋栽竹孤燈夜讀書
憐君亦同志晚歲傍山居

西山草堂一首

何處少人事西峯舊草堂
灑書秋日晚洗藥石泉香
後嶺有微雨北牕生夜涼
徒勞問歸路峯疊遠家鄉

貽隱者一首

迴報隱名士英憂山興闌求人顏色盡知道性情寬信
譜彈琴誤緣崖斲藥難東舉亦自給殊愧遠相安

竹林寺與李德玄別一首

騷人吟罷起鄉愁暗覺年光似水流花滿楚城傷遠別
蟬鳴蕭寺喜同遊前山日落杉松晚深夜風清枕席秋
明日分襟又何處江南江北路悠悠

送武全通處士歸章洪山一首

形影無辜消息沈
登聞三擊血濡襟
皇綱一日開冤氣
青史千年重壯心
卻望烏臺春樹老
獨歸蜗舍暮雲深
他時縱有徵書去
雪滿空山不可尋

題義女亭一首

身歿蘭閨道自明
郭南尋得舊池亭
詩人愁立暮山碧
賈客怨離春草青
四座月沈疑掩鏡
兩簷花動悟收屏
至今鄉裏風猶在
借問誰家義女銘

寄殷堯藩先輩一首

十載聞名翰墨林為從知己信浮沈
青山有雪諳松性碧落無雲稱鶴心
帶月獨歸蕭寺遠翫花頻醉庾樓深
尋思一見如瓊樹空把新詩盡日吟

吳門送振武李從事一首

晚促離筵醉玉缸伊州一曲淚雙雙
欲攜刀筆從新幕更宿烟霞別舊廳
代馬近秋侵紫塞吳帆乘月下清江
嫖姚若使傳書檄坐築三城看受降

夜泊松江渡寄友人一首

清露白雲明月天與君齊棹木蘭船南湖風雨一相失

夜泊橫塘心渺然

內闕字作欄
連去木字添

送人歸吳興一首

綠水棹雲月洞庭歸路長春橋懸酒幔夜柵集茶檣
葉沈溪暖蘋花逸郭香應逢柳太守為說過瀟湘

月夜期友人不至一首

坐待故人宿月華清欲秋管絃誰處醉池閣此時愁風
過渚荷動露含山桂幽孤吟不可曙昨夜更登樓

寄袁校書一首

擾擾換時節，舊山琪樹陰。
猶乖青漢志，空負白雲心。
廣陌塵埃遠，重門管吹深。
勞歌極西望，未省有知音。

內極西二

字元傑西望字粉塗重改

征西鶴卒一首

少年乘勇氣，百戰過烏孫。
力盡邊城難，功添上將恩。
曉風聽戍角，殘日倚營門。
自說輕生處，金瘡有舊痕。

王秀才自越見尋，不過題詩而迴，因以酬寄一首。

南齋知數宿半為木蘭開晴閣留詩徧春帆載酒迴烟
深揚子宅雲斷越王臺自有孤舟興無妨更一來

送客歸蘭谿一首

花下送歸客路長應過秋暮隨江鳥宿寒共嶺猿愁衆
水喧巖瀨羣峯抱沈樓因君幾南望曾向此中遊

贈王處士一首

歸卧養天真鹿裘烏角巾茂陵聞久病彭澤醉長貧冠
蓋西園夜笙歌北里春誰憐清渭北久老釣魚人

送張厚浙東謁丁常侍一首

涼露清蟬柳陌空
故人遙指浙江東
青山有雪松當澗
碧落無雲鶴出籠
齊唱離歌愁曉月
獨看征棹怨秋風
定知洛下聲名士
共說膺門得孔融

宿松江驛卻寄蘇州一二同志一首

侯館人稀夜更長
姑蘇城遠路蒼蒼
江湖潮落高樓迥
河漢秋歸廣簾涼
月轉碧梧移鵲影
露低紅草濕螢光
名園詩侶應多思
暮醉笙歌掩畫堂

寄雲際寺子敬上人一首

萬山秋雨水縈迴紅葉多從紫閣來雲冷竹齋禪衲薄
已應飛錫過天台

遊楞伽寺一首

晚烟秋寺泛潮來水浸城根古堞摧盡日傷心人不見
石楠花滿舊歌臺

送薛洪秀才南遊訪山習業一首

姑蘇城外柳初凋同上江樓更寂寥繞壁舊詩塵漠漠

對牕寒竹雨蕭蕭
憐君別路隨秋鴈
盡我離觴任晚潮
從此草玄應有處
白雲青嶂一相招

夜歸孤山寺卻寄上盧郎一首

青雲有志路猶賒
心在琴書似憶家
醉別庾樓山色晚
夜歸蕭寺月光斜
落帆露濕迴塘柳
開院風驚滿地花
他日此身須報德
莫言空爰舊烟霞

贈桐廬房明府先輩一首

帝城春榜謫雲仙
四海聲華二十年
闕下書功無後輩

卷中文字掩前賢官成每喜江山靜道在寧憂雨露偏
自笑小儒非一鷄亦趨門屏莫相憐

贈裴處士一首

為儒白髮生鄉里早聞名暖酒雪初下讀書山未明字
形翻鳥跡詩調合猿聲門外滄浪水知君欲濯纓

石池一首

通竹引泉脉泓澄深室益驚魚翻藻葉浴鳥上松根殘
日留山影高風耗水痕誰家洗秋藥來往自開門

送蘇協律從事振武一首

琴樽詩思勞吏欲學龍韜王粲暫投筆呂虔初佩刀
夜吟關月苦秋望塞雲高去去從軍樂雕飛代馬豪

懷政禪師院一首

山齋路幾層敗衲學真乘寒暑移雙樹光陰盡一燈
風飄高竹雪泉漲小池冰莫訝頭來此修身欲到僧

送荔浦蔣明府赴任一首

路長春欲盡歌怨酒初酣白社蓮塘北青袍桂水南
驛

行盤馬道船宿避龍潭真得詩人趣烟霞處處請

秋夕有懷一首

念遠坐西閣華池涵月涼書迴秋欲盡酒醒夜初長露
白蓮衣淺風清蕙帶香前年此佳境蘭棹醉橫塘

秋齋寄遠一首

初霽獨登賞西樓多遠風橫烟秋水
上疎雨夕陽中高
樹下山鳥平蕪飛草蟲
惟應待明月千里共君同

經故行宮一首

臺閣參差倚太陽
年年花發滿山香
重門勘鏤青春晚
深殿垂簾白日長
草色芊眠侵御路
泉聲嗚咽遶宮牆
先皇一去無迴駕
紅粉雲鬟空斷腸

宣州開元寺贈惟直上人一首

曾與徑山為小師
十年僧行衆人知
夜深月色當禪處
齋後鐘聲到講時
經雨綠苔侵古畫
過秋紅葉落新詩
勸君莫厭江城客
雖在風塵別有期

秋晚懷茅山石函村舍一首

十畝山田近石涵，石涵風俗舊曾諳。
簷前白艾驚春燕，籬上青桑待晚蠶。
雲暖採茶來嶺北，月明沽酒過溪南。
陵陽秋盡多歸思，紅樹蕭蕭覆碧潭。

送令閒上人一首

近日高僧更有誰，宛陵山下過閒師。
東林共許三乘學，南國爭傳五字詩。
初到庾樓紅葉墜，夜眠蕭寺碧雲隨。
秋江莫惜題佳句，正是磷磷見底時。

送上元王明府之任一首

莫言名重懶驅雞
六代江山碧海西
日照蕙葭明楚塞
烟分楊柳見隋隄
荒城樹接沈書浦
舊宅花連罨畫溪
官滿定應歸未得
九重霄漢有丹梯

東遊留別李業秀才一首

煩君沽酒強登樓
罷唱離歌說遠遊
文字豈勞諸子重
風塵何幸故人憂
一程山路長侵夜
十里家書動隔秋
起凭欄干各垂淚
又驅羸馬向東州

客有卜居不遂薄遊汴隴者因題絕句一首

海燕西飛白日斜
天門遙望五侯家
樓臺深鎖無人到
落盡春風第一花

送鄭寂上人南遊一首

儒家有釋子
年少學支公
心出是非外
跡辭榮辱中
錫寒秦嶺月
盃急楚江風
惟恐故園思
山秋梨葉紅

雪上宴別一首

山斷水茫茫
洛人西路長
笙歌留遠棹
風雨寄華堂
紅壁耿秋燭
翠簾凝曉香
誰堪從此去
雲樹滿陵陽

留題李侍御宅一首

曾話平生志書齋幾見留道孤心易感恩重力難酬獨
立千峯晚頻來一葉秋雞鳴應有處不學淚空流
行次白沙館先寄上河南王侍郎一首

夜程何處宿山疊樹層層孤館開秋雨空堂停曙燈歌
慙漁浦客詩學鴈門僧此志無人識明朝見李膺

重哭楊攀處士二首

白疏為
綠雲翁

綠雲多學古黃髮竟無成酒縱中山性詩留上海名讀

書新樹老垂釣舊磯平今日悲前事西風聞哭聲

從官任直道幾處脫長裾歿後兒猶小葬來人漸疎鄰
翁占池館長吏覓圖書身賤難相報平生恨有餘

茅山題徐校書隱居一首

深居四十年語舊淚潺潺官滿春辭省兵來夜出關思
隨江鶴遠心寄海鷗閒莫訝頻相訪前峯似故山

題倪處士舊居一首

儒翁九十餘舊向北村居生寄一壺酒死留千卷書欄

推新竹少池淺故連疎但有子孫在帶經還荷鋤

南鄰樊明府久不還家因題林亭一首

湘南官罷不歸來高閣經年掩綠苔魚溢池塘秋雨過
鳥還洲島暮潮迴階前石隱碁終局牕外山寒酒滿盃
借問先生獨何處遠籬疎菊又花開

下第貽友人一首

身在關西冢洞庭夜寒歌苦燭熒熒人心高下月中桂
客思往來波上萍馬氏識君眉最白阮公留我眼長青

花前失意共寥落莫遣東風吹酒醒

送楊發東歸一首

江花半落燕雛飛同客長安今獨歸一紙鄉書報兄弟
還家羞著別時衣

貴遊一首

朝迴珮馬草萋萋年少恩濟衛霍齊斧鉞舊威龍塞北
池臺新賜鳳城西門通碧樹開金鏤樓對青山倚玉梯
南陌行人盡迴首笙歌一曲暮雲低

宿咸宜觀一首

羽袖飄飄杳夜風
翠幢歸殿玉壇空
步虛聲盡天未曉
露壓桃花月滿宮

紫藤一首

綠蔓穠陰紫袖低
客來留坐小堂西
醉中掩瑟無人會
家近江南卷畫溪

越中一首

石城花暖鷓鴣飛
征客春帆秋不歸
猶自保郎心似石

綾梭夜夜織寒衣

春日題韋曲席野老所居二首

背嶺枕南塘數家村落長鶯啼中婦懶蠶出小姑忙烟
草近溝濕風花臨路香自憐非楚客春望亦心傷

逸舍徧桑麻村南第一家林繁樹勢直溪轉水紋斜竹
院畫看筍藥欄春賣花故園歸未得到此是生涯

聞范秀水自蜀遊江湘一首

蜀道下湘渚客帆應不迷江分三峽響山竝九疑齊秋

泊鴈初宿夜吟猿正啼歸時慎行李莫到古城西

綠蘿一首

綠蘿縈數里本在草堂間秋色寄高樹晝陰籠近山移
花疎處過廡樂困時攀日暮微風起難尋舊逕還

晚泊七里瀨一首

天晚日沈沈歸舟繫柳陰江村早見寺山郭遠聞碓樹
密猿聲響波澄鴈影深榮華暫時事誰識子陵心

子陵釣臺貽行侶一首

故人天下定垂釣碧巖幽舊跡隨臺古高名寄水流鳥
喧羣木晚蟬急象山秋更待新安月憑君暫駐舟

江上喜洛中友人繼至一首

戰馬兩河道風驚嵩少塵全家南渡遠舊友北來頻罷
酒松桂晚賦詩蘭杜春何言今夜月同是洛陽人

宿東橫山瀨一首

孤舟路漸賒時見碧桃華溪雨灘聲急巖風樹勢斜獼
猴懸弱蔓鷓鴣睡橫槎漫向山林宿無人識阮家

貽遷客一首

無機還得罪直道不傷情
微雨昏山色疎籠閉鶴聲
閒居多野客高枕見江城
門外長溪水憐君又濯纓

題韋山人山居一首

斲藥去還歸家人半掩扉
山風藤子落溪雨豆花肥
寺遠僧來少橋危客過稀
不聞砧杵動應解製荷衣

再寄殷克藩一首

直道知難用經年釣水濱
宅從栽竹貴家為買書貧
就

學多名客登朝盡故人蓬萊自有路莫羨武陵春

陵陽送客一首

南樓送郢客西郭望荆門
危鵠下寒渚牛羊歸遠村
蘭舟倚行棹桂酒掩餘樽
重此一留宿前汀烟水昏

途經李翰林墓一首

氣逸何人識才高舉世疑
禰生狂善賦陶令醉能詩
碧水鱸魚思青山鵬鳥悲
至今孤塚在荆棘楚江湄

錢唐青山李隱居西齋一首

小隱西亭為客開翠蘿深處徧青苔林間掃石安碁局
巖下分泉遞酒盃蘭葉露光秋月上蘆花風起夜潮來
雲山遠屋猶嫌淺欲棹漁舟近釣臺

與鄭秀才叔姪會送楊秀才昆仲東歸一首

書劔功遲白髮新異鄉仍送故鄉人
阮公留客竹林晚田氏到家荆樹春
雪盡塞鴻南翥少風來胡馬北嘶頻
洞庭烟月如終老誰是長楊諫獵臣

贈桐江隱者一首

潮去潮來洲渚春
山花如繡草如茵
嚴陵臺下湘江水
解釣鱸魚能幾人

送宋處士一首

賣藥修琴歸去遲
山風吹盡桂花時
世間甲子須臾事
逢著仙人莫看棋

陳宮怨一首

風暖江城白日遲
昔人遺事後人悲
草生宮闕國無主
玉樹後庭花為誰

題旌儒廟一首

寒柏陰風萬古悲
儒冠相枕死秦時
廟前亦有商山路
不學老翁歌紫芝

謝亭送客一首

勞歌一曲解行舟
紅樹青山水急流
日暮酒醒人已遠
滿天風雨下西樓

南遊泊松江驛一首

漠漠故宮地
月涼風露幽
雞鳴荒戍曉
鴈過古城秋
楊

金史卷之八十一
卷六
柳北歸路黃葭南渡舟去鄉今已遠更上望京樓

松江懷古一首

故人今何在扁舟竟不歸
雨餘山漠漠江闊樹依依
暮色千帆落秋聲一鴈飛
此時兼送別憑檻欲霑衣

孤鴈一首

昔年雙鬢頽池上靄春暉
霄漢力猶怯稻梁心已違
蘆洲寒獨宿榆塞夜孤飛
不及巢簷燕西風相逐歸

題李元之幽居一首

宅前雲水滿高興一書生垂釣有深意望山多遠情夜
暮留客宿春酒勸僧傾未作干時計何人記姓名

長興里夏日寄南鄰避暑一首

侯家大道傍蟬噪樹蒼蒼開鑠洞門遠卷簾高館涼欄
圍紅藥盛架引綠蘿長永日一歌枕故山雲水鄉

天街曉望一首

曉星低未央蓮闌迴蒼蒼疊鼓送殘月疎鍾迎早霜闕
河浮瑞氣宮館耀神光再拜為君壽南山高且長

早春懷江南一首

雲月有歸處故山清洛南如何一花發春夢徧江潭

送友人自荆襄歸江東一首

時友人
新夜偶

商洛轉江濱一盃聊慰君
劍愁龍失伴琴怨鶴離羣
楚驛枕秋水湘帆凌暮雲
猿聲腸斷夜應向雨中聞

洞靈觀冬青一首

霜霰不凋色兩株交石壇
未秋紅實淺經夏綠陰寒
露重蟬鳴急風多鳥宿難
何如西禁柳晴舞玉欄干

送客南歸有懷一首

綠水暖青蘋
湘潭萬里春
瓦樽迎海客
銅鼓賽江神
避雨沿風岸
看雲渡柳津
長安一盃酒
座上有歸人

送太昱禪師一首

禪林深竹裏
心與徑山期
結社多高客
登壇盡小師
早秋歸寺遠
新雨上灘遲
別後江雲碧
南齋一首詩

長安旅懷一首

久客怨良夜
西風吹鴈聲
雲移河色淺
月泛露華清
掩

琴獨凝思緩歌空寄情門前有歸路迢遞洛陽城

春望一首

南樓春一望雲水共昏昏野店歸山路危橋帶郭村晴
烟和草色夜雨漲溪痕下岸誰家住殘陽半掩門

酬杜補闕初春雨中舟次橫江喜裴郎中相迎兼見寄
之什一首

江館維舟為庾公暖波微綠雨濛濛紅檣迤邐春巖下
朱旆睽翮曉樹中柳滴圓紋生細浪梅含香艷吹輕風

郢歌莫問青山吏魚在深池鳥在籠

題衛將軍廟一首

并序

將軍名逖陽羨人少習詩書仍學劍有武略二十七遊
并汾間神堯皇帝始揭義旗逖進備行列洎擒竇建德
逖持挾槍劍前突後翼太宗顧而多之天下既定第其
功拜將軍宿衛以母老且病乞歸侍殘年辭旨哀激詔
許之既而以孝敬睦閨門以然信居鄉里及卒邑人懷
之廟于荆溪之湄以平生弓甲懸東西廡下歲時祠祭

馬或云頗福其土邑文士王敖撰碑詞寔詳備惜乎國
史闕載其功因題詩于廟壁

武牢關下護龍旂挾製彎弧馬上飛漢業未興王霸在
秦軍纔散魯連歸墳穿大澤埋金劍廟枕長溪掛鐵衣
欲弔忠魂何處問葦花楓葉雨霏霏

送前東陽于明府由鄂渚歸故林一首

結束征車換黑貂灞西風雨正蕭蕭茂陵久病書千卷
彭澤先歸酒一瓢帆背夕陽湓水闊棹經秋月甌山遙

殷勤為謝南谿侶白首螢牕未見招

內通字元作
秋字注改

泛溪迴寄道元上人一首

南郭烟光異世間碧桃紅杏水潺潺
猿來近嶺獼猴散魚下深潭
弱翠閒猶阻晚風停桂檝欲乘春
月訪松關
幾回策杖終難去洞口雲歸不見山

留別裴秀才一首

三獻無功玉有瑕更携書劍客天涯
孤帆夜別瀟湘雨廣陌春期鄠杜花
燈照水螢千點滅棹驚灘鴈一行斜

關河迢遞秋風急望見鄉山不到家

傷虞將軍一首

白首從軍未有名近將孤劔到江城
巴童戍久能番語代馬調多解漢行
對雪夜窮黃石畧望雲秋計黑山程
可知身死家猶遠汴水東流無哭聲

李定言自殿院銜命歸闕拜員外郎俄遷右史因寄一首

白筆南征變二毛越山愁瘴海驚濤纔歸龍尾含雞舌

欽定四庫全書

寶真齋法書贊卷六